

以許入館學玷汚青衿為可駭則以淫媚賤穢之產玷汚衣冠難名犯分獨不可駭乎

○以李浚慶為吏曹判書尹元衡為兵曹判書○夜民方東方巽方南方坤方乾方如火氣

癸酉傳曰黑山島搜討頃於經席多陳其不可而今聞兵船多不知去處極為驚慮其速探問馳啓事下書可也○日暈兩珥色外青內白

甲戌 上親傳先農祭香祝○慶尚道癘疫熾發命送藥材救之○憲府啓曰兵凶器戰危事聖人之所慎者全在於此近來朝廷之間頗有用兵之議武夫之輩希恩望賞唾掌奮臂一試於平安而結胡人之怨再試於咸鏡而仍巨未得西羅一空更舉草串之師雖曰少捷必有後患而朝廷既賞平安之功又議咸鏡之勞以啓武夫輕人命重邊功之習有識之士莫不憂之全羅水使金景錫搜討黑山島而漂失十二船其船所載者無慮四五百人而溺於滄波葬於魚腹不可忍言而况虞候尹世